

Powšitkowne WOZJEWJENJA

njedźelu, 8. měrca 2015

K čemu smy my cyrkej? – K čemu sym ja křesćan?

Wšitcy člonjo wo sadnych radow w Budyskim dekanaće a Towarstwa Cyrila a Metoda z.t. (TCM) su njedźelu, 15. měrca, na dalekublanje k temje „K čemu smy my cyrkej? – K čemu sym ja křesćan?“ přeprašeni. Wone budže wot 8 do 10.20 hodź. na Chróšćanskej farje. Přednošk změje Matthias Mader z Drježdžanskeho biskopskeho ordinariata. Tež dalši zajimowani su wutrobnje na tute zarjadowanje witani. Wobdźělnicy móža w 7 hodź. (serbsce) abo w 10.30 hodź. (němsce) njedźelnu Božu mšu w Chróšćanskej cyrkwi wopytać.

Modlerska iniciatiwa „24 hodźin za Knjeza“

Bamž Franciskus je katolsku cyrkej po cyłym swěće wot pjatka do soboty, 13. do 14. měrca, na 24hodźinske modlenje za Knjeza pod temu „Bóh – na smilowanje bohaty“ (Ef 2, 4) přeprašy. W Serbach přewjedže so tute modlenje na iniciatiwu Chróšćanskeje a Wotrowskeje wosady w kapalce Domu swjateje Ludmile w Chrósćicach. Tam wustaji so Najswjećiše pjatk po nyšporje, kotryž započnje so w 16 hodź. Hač do soboty wječora móža so wěriwi ze wšěch wosadow potom před Najswjećišim modlić, tež jenož krótki čas.

Přiležnosć k swjatej spowědži budže sobotu popođnju w sakristiji – wot 13 do 14 hodź. pola fararja Bena Jakubaša, wot 14 do 15 hodź. pola fararja Daniela Dzikiewicza a wot 15 do 16 hodź. pola fararja Clemensa Hrjehorja. Modlerska iniciatiwa zakónči so sobotu we 18 hodź. z krótkim nyšporom.

Projektowy dzeń k skrućenju džěci

Wšitke džěci wot předšulskeje staroby hač do 6. lětnika su sobotu, 21. měrca, na projektowy dzeń pod heslom „Starkmachtag“ do Njebjelčic přeprašene. Dalšej budžetaj 27. junija w Chrósćicach a 19. septembra w Radworju. Skrućić maja so džěci w swych prawach a z tym so přewencija polěpšić, zo njebychu so hranicy překročeli. Wone dóstanu pak tež pokiwu, kak měli so we wěstych situacijach zadźeržeć a ze staršimaj wo tym rěčeć. Z tutym projektom maja so starši w jich kubłanskim nadawku podpěrać.

Tutón dzeń k skrućenju džěci zarjadowuje dekanatne dušepastyrstwo we Worklecach zhromadnje z dušepastyrstwom džěci Drježdžansko-Mišnjanskeho biskopstwa. Němska biskopska konferenca jón podpěruje. Nadrobnosće zhonja zajimcy z plakata a z wupožehnych flyerow w cyrkwjach kaž tež pod www.posol.de. Staršej mětoj swoje džěčo pisomnje w dekanatnym dušepastyrstwje we Worklecach, Młynski puć 4, přizjewić. Při tym mětoj wobkedźbować, zo su městna wobmjezowane. Přizjewjenja za zarjadowanje w Njebjelčicach přijimuju hač do štwórtka, 12. měrca, za dalše w Chrósćicach hač do 18. junija a za třeće w Radworju hač do 10. septembra.

Putnikowanje swójbow

Putnikowanje swójbow ze serbskich wosadow pod heslom „Što wěra zamóže“ do Róžanta budže pjatu póstnu njedźelu, 22. měrca. Božu mšu w hnadownej cyrkwi w 9 hodź. změje farar Gabriš Nawka. Putnikowanje ma heslo „Swójbja – žórło dobrych počinkow“.

„Cuzy być – hósć być – doma so čuć“

Posledni wječor w rjedže lětušich póstnych seminarow w Domje biskopa Bena w Smochćicach budže pónđzelu, 9. měrca, pod temu „... sym cuzy był, a sće mje pohosćili“ (Mt 25,35) – Migracija jako teologisko-praktiska tema. Zawodne słowa změjetaj Dietrich Gerstner a jezuitski pater Fridolin Pflüger. Rjad póstnych seminarow steji pod heslom „Cuzy być – hósć być – doma so čuć“ zakonči so z filmowym wječorom pónđzelu, 16. měrca, w Budyskim Kamjentnym domje. Započatk je stajnje w 19.30 hodź. Mjez sobuzarjadowanjami je Towarstwo Cyrila a Metoda z.t.

Wo požadarjach azyla a čěkancach

W zetkanišću Carity w Kamjencu, Dróha jednoty 2, budže štwórtk, 19. měrca, w 17 hodź. lětuše regionalne zetkanje čłonow Carity. Tema wječora rěka „Požadarjo azyla a čěkancy“. Přeprošeny je k tomu René Burk, nawoda porjadowego zarjada w Budyšinje. Nimo čłonow Carity su tež wšitcy dalši zajimcy do Kamjenca wutrobnje přeprošeni.

Zhromadny dzeń za 3. a 4. lětnik

Dekanatne dušepastyrstwo přeprošuje džěci 3. a 4. lětnika na zhromadny dzeń sobotu, 14. měrca, wot 9.00 do 15.00 hodź. do Don Boskoweho domu we Worklecach. Zajimcy njech so prošu hač do wutory, 10. měrca, pod telefonowym čisłom (0 357 96) 8 87 07 přizjewja. Za wudawki dnja zběra so přinošk, kotryž wučinja na wobdźělnika štyri eura.

Spěwy z wuchodneje Europy zaklinča

Vokalna skupina VALERINA wuhotuje přichodny koncert w rjedže Smochčanske jewiščo, kotryž budže sobotu, 14. měrca, w 19.30 hodź. w Domje swjateho Bena w Smochćicach. Skupina VALERINA, kotraž wobsteji ze štyri čłonow, zanjese sakralne a ludowe spěwy z Ruskeje, Běloruskeje a Ukrainy.

Wo ludowych nałožkach wokoło jutrow

Marita Andó porěči srjedu, 11. měrca, w 19 hodź. w Budyskim Serbskim muzeju wo ludowych nałožkach pod temu „Wot swěčk Marje do swjatkow“. Hodžinu do spočatka poskićuje muzej wodženje po wosebitej wustajeńcy wo jutrownych nałožkach w Europje. Tuta ma hesło „Wjace hač pisane jejka“.

Putniska jězba z busom do Mariazella

Mariazell w Awstriskej je hłowny cil našeje putniskeje jězby. Nimo toho chcemy wulkotny benediktinski klóšter Melk nad Dunajom, Narodny park Gesäuse a klóšter Admont wopytać. Předwidžane je tohorunja, zo wobhladamy sej z łódže luboznu krajinu Wachau a zo přebywamy w uniwersitnym městačku Krems. Přenocujemy stajnje w Mariazellu. Jězba wotměje so wot pónđzele do soboty, 12. do 17. oktobra. Přizjewić móžeće so pola Šmitec w Radworju, telefonowe čisło (03 59 35) 28 60.

T. Kubašec

Do Fatimy z busom

Pytam dale za zajimcami, kiž bychu rady hnadowne městno Fatimu wopytali, ale z lětađlom njeleća. Tutu putnisku jězbu bychmy za klětu planowali. Wona budže dwanaće dnjow trać. Zajimcy njech so prošu pola mje pod telefonowym čisłom (03 59 35) 2 04 25 přizjewja.

T. Kubašec

